



Rezistans ek Alternativ
Bois Cheri Rd | Moka
contact@papiyon.org

Media Release

31 desam 2022

Wakashio (Rapor court of Investigation)

Nouvo trayizon gouvernman Pravind Jugnauth

Rezistans ek Alternativ finn pran not a traver Cabinet Decision le 23 Desam 2022 ki rapor *Court of Investigation* lor Wakashio inn sorti. Nou finn osi pran not ki gouvernman Pravind Jugnauth inn desid pou met enn komite inter-ministeriel pou examinn rekomandasion rapor la. Se atraver la pres ki Rezistans ek Alternativ ek piblik Moris inn aprann ki rapor pa pou rann piblik. Sa desizion la vinn demontre ankor enn fwa a ki pwin gouvernman Pravind Jugnauth pe anferm limem dan enn totalitarism danzere ek san presedan dan listwar Moris. O lie ki gouvernman MSM atantif a diferan kritik lor zesyon katastrof Wakashio ek permet nou pei tir leson nesaser, sa gouvernman la desid ankor fwa pou trayir lepep. Sa ak inilateral pou gard sa rapor la dan lame gouvernman demontre non selman karakter despotik sa gouvernman la, me osi Pravind Jugnauth limem an tan ki Premie Minis.

Depi le 25 Ziliye 2020 kan Wakashio inn kraz lor resif Pointe d'Esny ziska zordi gouvernman MSM pa finn fer nanyen ki al dan sans lintere piblik. Popilasion Moris pou rapel ki sa gouvernman la ti ena 12 zour pou pran enn desizion pou anpes marenwar. Lepep Moris pou rapel ki mem kan finn gagn marenwar dan lagon gouvernman inn dir sa "fake news" dan parlman. Lepep Moris pou rapel a ki pwin gouvernman ti depase kan finn ena mare nwar. Lepep pou rapel ki kan bann premie militan Rezistans ek Alternativ kre loperasion boue sarlon pou sov nou lagon, kouma gouvernman inn fer tou pou dekouraz dimounn vinn donn koudme. Lepep pou rapel kouma Pravind Jugnauth antan ki Premie Minis ki ena responsabilite sekirite Moris ek so popilasion inn refiz prezant exkiz swit a lekositid Wakashio. Se pou otan rezon ki Rezistans ek Alternativ ti akiz gouvernman Pravind Jugnauth de 'neglizans kriminel' a lepok.

Aster desizion kabine Minis pou nway rapor sa Court of Investigation dan enn teknokrasi institusionel sekre se enn trayizon anver tou Moris. Enn trayizon anver popilasion, lanatir ek sirtou anver lepep lakot sid-es ki finn soufer grandman de sa dram la. Sa desizion kabine Minis la pa fer ditou dan lintere piblik ek lepep Moris ena drwa poz li la kestion; **ki motiv sa desizion la**? Fodre pa ki lepep Moris bliye ki se an prezans bann ofisie Leta Morisien ki konpani lasirans Wakashio inn fer dimounn renons a zot drwa kont enn ti mizerab konpansasion-reparasion.

Desizion kabine Minis al dan mem sans ek priv Moris de enn parti verite ki revinn li de drwa lor Wakashio. Tou sa abitan lakot sid-es Moris ena drwa a laverite. Sa milie dimounn ki finn donn koudme a traver Moris pou fer boue sarlon pou sov zot lagon ena drwa la verite. Tou zanf an sa pei la ki res Moris ou ayer ena drwa a la verite. Apar verite dan zafer Wakashio, ena osi tou laspe legal a lakel trayizon gouvernman Pravind Jugnauth poz prezidis. Rezistans ek Alternativ inn anrezistre plis ki 4000 dimounn pou enn case domaz kont proprieter Wakashio. *Terms of Reference* sa *Court of Investigation* inn kouver sifizaman laspe ki kapav defann lintere Moris dan enn ninport ki lakour: depi lesouaz Wakashio ziska desizion pou koul enn parti bato an pasan par domaz lor lekositem marin. Azoute a sa, non divulgasion sa rapor la se osi enn trayizon anver sa 4 marin, anlplwayer MPA, ki finn perdi lavi dan loperasion otour Wakashio. Sa trayizon gouvernman

Pravind Jugnauth antrav la fami ek pros sa bann marin la pou reklam zistis.

Rezistans ek Alternativ pe reklam ki rapor Court of Investigation rann piblik o pli vit dan lintere pei ek lanasion Morisien. Si Pravind Jugnauth anvi met enn komite inter-ministeriel pou etidie rapor la se so drwa me sa pa kapav fer o prezidis de la verite ki so gouvèrnman dwa lepep lor zafer Wakashio.

Rezistans ek Alternativ osi lans enn lapel a lepep Moris. Parey kouma popilasyon ti soutenir loperasion boue sarlon pou sov nou lagon an Out 2020; zordi li inportan ki lepep ralie – otour aksion kominn lor reparasion sosial ek ekolojik viz-a-vi konpanye Zapone Wakshio, ek an paralel ralie otour konstriksion boue demokratik ki ReA pe inisie pou sov nou pei, sanz sistem ek sanz gouvèrnman.

Stefan Gua

57 82 61 97

pou Rezistans ek Alternativ